

欽定剿平粵匪方略

欽定剿平粵匪方略卷二百十八 己未年

四月十二日 壬子 胡興仁奏言查甯國軍情兼訪

輿論僉謂鄭魁士性情乖僻措置失宜愛憎賞  
罰不能一秉大公灣沚賊蹤潛遁實係青龍山  
諸將轟擊西河之力鄭朝棟等並未接戰輒奏  
稱灣沚殺賊八百餘人真有功者不錄前此南  
陵被圍緊急吳再升胡鳳鳴等苦求援應提臣

因有書無稟怒擲於地竟不發兵令堅守退賊  
胡鳳鳴受傷回郡稟謁不見謂賊退係該提臣  
聲威非諸將之力而將領皆寒心矣都守以下  
露體箠楚道府以下當面呵斥賞罰屢失其平  
愛憎尤多任意凡係鄧紹良得用之人不論賢  
否必遭屈辱殊非守正持平之道前隨鄧紹良  
陣亡兵勇二千餘名至今尙不查明請卹尤無

以慰忠魂而作士氣此提臣鄭魁士總統失宜之實在情形也臣伏查皖南形勢能鼓將士之氣萬六七千守之而有餘若墮將士之心卽倍於萬六七千而亦不足浙餉萬分支絀臣所給於甯防者較晏端書在浙時每月已加數萬兩鄭魁士一切軍務未准咨商添募勇數亦不造冊咨知臣無從查覈現在南陵時有虛驚萬一

窮寇竄入將士解體貽害恐不止徽甯兩郡臣  
既查詢確實惟有據實密陳伏乞

皇上俯念甯防緊要另予權衡臣無任悚惶待

命之至奏入

上命軍機大臣傳諭和春何桂清曰胡興仁奏提督鄭  
魁士性情乖僻措置失宜各款如果屬實是該提督  
情性乖張誠恐將士解體於軍務大有關係著和春

何桂清秉公查明據實具奏至所稱鄭魁士於一切軍務未准咨商招募勇數亦不造冊咨知無從查覈則是胡興仁負氣之言亦難逃朕洞鑒惟甯國防務現當喫緊之際朕閱鄭魁士前日奏催浙餉摺內亦多有不滿胡興仁之語該二員器量淺隘各不相能恐致貽誤大局鄭魁士平日打仗尙稱勇往前在皖北卽不能與福濟和衷辦事現在甯國復蹈故轍恐

難勝統帥之任著和春等悉心體察毋得以保奏在前稍存回護

胡興仁又奏言准提臣鄭魁士咨稱江北賊匪經官軍擊敗四面竄散意在分途撲犯又聞浦口賊營退去數座悉竄南岸蕪太之間囑臣飭調參將黃金友帶隊赴廣建一帶以顧江浙門戶又據福建汀州鎮總兵米興朝函稱南陵西

路之賊經我軍擊退後嘯聚九廊廟該處接壤  
青繁亟應加意堵剿防其復犯是南陵一帶軍  
情喫緊而蕪太一路可以不由甯郡直下廣建  
要道尤不可不嚴爲之防當飭令黃金友帶勇  
二千餘名前赴廣建一帶擇要扼紮仍派甯紹  
台道仲孫懋酌帶丁勇駐紮該處督辦防務並  
資策應其衢防暫令革員楊國正扼紮奏入報



十六日丙辰勝保翁同書奏言粵逆大股四五萬

人由浦口一路東趨六合分屯天來盱三縣所

屬各鄉鎮匪蹤愈偏愈近探係四眼狗陳玉城

受洪逆僞諭以江浦浦口猝難力爭意欲繞由

天長揚州假道渡江直搗江南大營之後並分

股攻襲江北官軍營盤以圖解六合之圍再謀

大逞查金陵正當攻勦喫緊之時設該逆遂其  
假道之志南北勾結蔓延大局又不可問因添  
派遊擊滕遇春帶湖南兵一千五百名馳赴東  
路與總兵張得勝等各起兵勇會合迅由汊澗  
鎮迎前扼擊卽令李世忠一軍爲接應並派遊  
擊尙阿布帶領安徽撫標官兵前往天長歸德  
安調遣仍恐前派之營總常海吉隆阿等馬隊

稍單復添撥記名副都統營總得春西蒙額等  
帶馬隊二百餘名馳往助勦以厚兵力自初一  
至初二三四等日該逆由六安所屬之竹鋪集  
一帶連次出撲掠糧均經我軍分路擊退敗賊  
回竄竹鎮初七日常海等帶領馬隊向竹鎮進  
勦該逆馬步約二三千名前來迎拒該營總等  
分路衝殺槍箭齊發立斃悍賊數十名賊隊散

亂乘勞追趕二十餘里沿途斃賊五六百名生  
擒四十餘名張得勝亦於是日由六合以北之  
八步橋出隊截勦斃賊三百餘名其東五廟德  
安一軍連日迎擊亦有斬擒惟因四合墩一帶  
踞賊甚多該提督兵不滿千深慮該逆抄後難  
以抵禦旋即撤至天長東關外扼紮與參將保  
英等協力守禦據擒賊供稱該逆銳意欲由儀

徵一帶渡江救援金陵如官軍阻截不得逞志  
卽全股撲犯淮揚另作詭謀臣思汧澗一鎮爲  
天盱前路緊要門戶上年臣督軍攻克天長始  
得扼其北犯今該逆復前窺伺是天長一城關  
繫甚鉅隨派侍衛穆騰阿分帶精壯馬隊扼紮  
明光與駐守殷家澗之臬司王庭蘭軍聯絡援  
應臣卽於初八日親督大隊由池河馳赴汧澗

相機策應期於一切勦辦機宜較爲妥速奏入  
報

勝保翁同書又奏言據探該逆仍盤踞竹鎮一  
帶牽掣我兵已分大股由六合官軍後路竄撲  
儀徵勢將逼近揚城情形危急臣擬抽派張得  
勝帶領兵勇三千餘名並加派馬隊三四百名

星夜由天長南路飛速前進以搗其後而牽賊  
勢但賊數衆多能否卽時勦辦得手再當續行  
奏報以慰

宸廑奏入

上命軍機大臣傳諭勝保曰粵逆盤踞竹鎮一帶分大  
股由六合官軍後路竄撲儀徵勢將逼近揚城勝保  
現派總兵張得勝帶兵由天長南路前進以搗其後

有此一軍自可稍牽賊勢惟逆蹤飄忽必須迎頭截  
擊方能力遏其衝毛三元現在防守揚州著勝保就  
近調度飭令帶兵迎剿爲兩面夾攻之計該大臣現  
已親督大隊由池河馳赴汙濶卽可節節前進相機  
布置毋令該逆蔓延是爲至要

十八日 戊午 和春奏言准富明阿函稱創痕過重

舉動維艱現已登舟養傷稟請派員接辦當派



提督鞠殿華總兵張玉良熊天喜安勇等暫行  
代辦江北軍務並飭已革參將鄧聯科帶兵一  
千馳往六合聽候調遣旋據該鎮等先後稟稱  
逆匪七八萬衆竄過靈巖山腳斷我儀徵來路  
揚言撲犯天長儀徵揚州等處志在分我兵力  
張玉良等會商先由安勇帶兵一千八百餘名  
剋日馳赴揚州會合總兵毛三元扼堵東北一

面惟賊已抄出官兵後路直抵猴子鋪太平集  
一帶距儀徵止三十餘里該逆銳意東竄應卽  
力扼維揚以固清淮門戶當卽飛飭張玉良督  
同副將馬德昭揀帶馬步四千二百餘名先後  
馳往會同堵剿頃據探報該逆由小路竄過儀  
徵突至揚州西門外十餘里繞至城東北隅之  
五臺山並三汊河一帶焚掠聲言欲竄瓜州現

在馬德昭所部已由水路至沙頭洲登陸助勦  
兼顧裏下河各屬覈計初十日必到揚州張玉  
良十一日亦可到防有此聲威當足以遏衝突  
惟邵伯一鎮北通高郵西接天長尤爲清淮緊  
要門戶現在添派兵勇一千交張玉良調遣無  
論賊蹤所向總以嚴防北犯爲第一要義一面  
再由金陵派兵一千名馳赴鎮江會同該處兵

勇巡防守禦並飭副將鞠耀乾督飭水師嚴扼  
南北江防以免賊蹤偷越至江浦浦口屯賊雖  
已半趨六合而九里山後暨浦口東南一帶仍  
有大股結巢負固爲九洲洲逆援臣函致張國  
樞當隨時酌度防剿總期並顧兼籌保全大局  
不致潰裂

和春又奏言查六合逆援業已分股東犯維揚

抄越大營之後揚州危急邵伯高郵以上處處  
戒嚴地大兵單惟有暫將六合現存兵勇步步  
翻營而退撤赴揚州分別布置總期扼守郡城  
以重南北鎖鑰仍嚴防邵伯鎮萬福橋等處杜  
其北竄高郵東犯通泰之路兵力旣厚以勦爲  
堵大局方有轉機臣等已飭總兵馮子材就江  
浦軍營揀帶勁旅一千名長夫一千餘名馳往

六合會同鞠殿華熊天喜等妥爲辦理仍令水師鎮將豫備船隻陸續渡過鎮江星馳前往奏  
八

上命軍機大臣傳諭和春張國樑許乃釗曰昨閱勝保奏報大股賊匪竄撲儀徵將倡揚城該大臣派張得勝從天長南路進援擣賊之後已有旨令毛三元帶兵迎勦爲兩面夾攻之計本日據和春奏稱該逆銳

意東竄已由小路竄過儀徵並突至揚州西門繞擾  
五臺山及三汊河等處揚州係南北要途應飭張玉  
良等悉心保障兼顧裏下河各屬而高郵邵伯爲北  
走清淮門戶和春等旣添派兵勇一千名交張玉良  
調遣務須飭其嚴防北犯其東路通秦一帶尙爲完  
善之區更不可令其蹂躪腹地至該逆聲言欲竄瓜  
州則瓜鎮京口水陸均須嚴密布置該大臣復由金

陵派兵一千名赴鎮江巡防並著嚴飭鞠耀乾督率  
水師扼守江防勿令偷越現在浦口九洲尚有賊  
援往來揚州軍情復如此緊急著和春等會同張國  
樑隨時應援並與勝保派援之兵探賊所向互相策  
應務全大局其六合兵勇雖因援勦揚州暫時移撤  
亦不可任賊猖獗別有他虞

十九日 己未 署漕運總督江南河道總督庚長奏



言本月初八日逆匪竄至揚州圍撲並分股圖  
擾邵伯仙女廟等處經和春派總兵安勇等帶  
兵抵揚復經道員朱善張等會同開礮將賊擊  
退城圍頓解惟賊退未遠現尙麇集六合訊據  
生擒賊供有裹糧北竄清淮之意臣以蔣壩爲  
安徽後路文報餉道所關正在分派兵勇擇要  
扼堵據報天長失守裏河以南居民駭散天長

南連六合西徧滁州東南與儀揚接壤東與甘泉高寶處處可通北則直達蔣壩賊所必爭蔣壩兵勇無多現咨傳振邦派兵二千由固鎮渡湖馳赴該處再清江之南高澗地方爲蔣壩後路亦募勇派員管帶並就近號召湖團互相應援又於各路添設塘撥以通消息頃據漕臣函稱以天長報警派副將鶴齡酌帶兵勇馳赴衡

陽相機堵剿衡陽係蔣壩下游爲淮安門戶自  
應派兵前往布置冀臻周密奏入

上命軍機大臣傳諭勝保傅振邦庚長曰逆匪圍撲揚  
州經和春派安勇等帶兵趕到擊退賊匪立解城圍  
而天長失陷該處接壤儀揚東通甘泉高寶北達蔣  
壩庚長已咨商傅振邦派兵由固鎮渡湖東援並於  
高潤募勇集團爲蔣壩後路策應復經邵燦派令鶴

齡酌帶兵勇馳赴衡陽以固淮安門戶布置尙臻周  
妥本日因邵燦患病開缺令袁甲三以三品頂戴署  
理漕運總督到任尙需時日已降諭旨令庚長兼署  
漕督篆務此時賊氛愈熾該河督務須督飭所屬加  
意堵剿勝保前派張得勝由天長南路進剿是否趕  
到該大臣本從池河赴汴澗調度應卽酌度緩急探  
賊所向迎頭截擊勿使北犯清淮並迅圖克復天長

勿令久踞其天長連界之滁州等處如何兼顧妥爲  
辦理庚長咨調之官兵二千名著傅振邦體察情形  
如能分撥迅速派赴蔣壩毋稍遲緩

二十一日 辛酉 勝保翁同書奏言 臣勝保現已行

抵汧澗探知賊分大股竄撲儀徵一路當撥馬  
步兵勇跟蹤追擊一面令副將李世忠於天長  
東西南三門外分紮營壘聯絡東關外提督德

安一軍以圖扼要臣仍親督官兵進剿西南竹  
鎮一帶踞匪詎四月初十日逆首陳玉城率衆  
直趨天長經德安李世忠帶兵迎剿該逆分股  
繞抄官軍之後時李世忠東面營壘尙未築就  
該逆猝由北路直薄城關德安受傷陣亡李世  
忠一軍亦遂潰退城兵不敷守禦參將保英力  
不能支遂爲該逆乘虛撲入臣卽調馬步各軍

親統迎擊二十日行至石梁地方遇賊接仗殺  
賊甚夥追過石梁河岸以南該逆大隊踵至臣  
指揮各軍屢撲屢壓始行擊退查點我兵亦有  
傷亡當以該逆勢衆未可輕進卽令總兵張得  
勝等軍仍紮汭澗鎮以顧西面竄路臣帶親軍  
回駐舊鋪地方以扼北竄盱眙之路並派營總  
得春等帶馬隊二百餘名留防汭澗爲張得勝

等接應布置甫定逆衆萬餘繞由西南直撲汭  
澗營盤張得勝等待賊偏近連用槍礮轟擊賊  
始敗退我兵追殺二十餘里斃賊約五六百名  
生擒二十餘名餘俱遁回天長縣城據擒賊供  
稱逆衆欲由天盱一路北竄清淮直犯揚儀然  
後聯絡浦六匪蹤爲南援金陵之計是日前之  
急惟在力固盱眙前路臣不得不親赴盱眙布



置堵勦機宜一俟淮北調撥馬隊提到仍親督  
籌剿現撥兵於馬家壩添紮營壘以聯蔣壩聲  
勢其李世忠一軍令暫紮半塔集地方聽候調  
遣一面飛咨庚長添撥兵勇責令原防蔣壩員  
弁實力堵禦並咨明和春張國樑等迅速分軍  
馳赴天長東南仁和集一帶會剿卽以顧揚儀  
後路第天長以東濱臨高寶各湖設被該逆擴

船徑渡則仍可繞犯淮揚不可不加意防範應  
請

旨飭下漕河兩臣就近親往布置嚴密籌防以免疏虞  
提督德安勦賊捐軀深堪憫惻仰懇

皇上天恩賞還花翎勇號照提督陣亡例議卹奏入

上命軍機大臣傳諭勝保翁同書曰賊匪竄踞天長意  
欲由天盱一路北竄清淮直犯揚儀然後糾合浦六

匪蹤爲南援金陵之計勝保所籌均尙周妥著俟淮  
北調撥之馬隊一到該大臣卽親督調度探賊所向  
迎頭截擊迅圖克復天長勿令久踞並一面飛咨庚  
長等分飭嚴防蔣壩及高寶各湖勿令賊蹤闖入

上諭內閣曰湖北提督德安帶兵在天長縣城之東關

外駐紮扼守猝遇大股粵匪由六合繞道直薄城關  
致被闖入該提督力戰捐軀殊堪憫惻德安著賞還

花翎勇號交部照提督陣亡例議卹以慰忠魂

二十二日壬戌雲南提督傅振邦奏言粵匪由六

合紛竄勢極猖獗盱眙蔣壩萬分喫重臣派赴  
勝保軍營之馬隊恐難調回臣營所贍不足千  
名勢難得力況清淮一帶現亦戒嚴更不得不  
豫籌兼顧以固北路門戶仰懇

天恩在天津防堵官兵內添撥馬隊一千名迅赴臣營

俾資調遣而免貽誤奏入

上命軍機大臣傳諭僧格林沁曰粵逆現由六合紛竄  
蔣壩盱眙重清淮戒嚴傳振邦因馬隊不敷調遣  
請於天津防堵官兵內添撥得力馬隊一千名前往  
助剿惟天津續調吉林黑龍江兵二千名原爲慎重  
海防起見是否可酌撥五百名前往傳振邦軍營之  
處著僧格林沁酌量辦理如此項官兵不能抽撥卽

著該大臣於備調之綏遠歸化二城官兵內調撥五百名飭令馳赴安徽蒙城一帶交傅振邦調遣並著一面奏聞一面咨調毋稍延緩

二十五日乙丑官文胡林翼奏言楚軍入皖者多

隆阿鮑超等已逼近太湖計馬步九千餘人道員唐訓方蔣凝學等率七千人進駐太湖池南之荊橋爲多隆阿等後路接應其留防陳德園

之軍則以參將阿達春同知歐陽正墉領之計  
二千五百人以彌縫太湖之闕其分進英山一  
路者爲參將余際昌之二千人通計入皖之師  
已逾二萬餘人其分駐羅田麻城等處不過千  
人五百人爾以地勢賊情而論必非兩月所能  
奏功水師圍攻安慶亦必待太湖東流潛山及  
安慶之石牌克復乃可馬步併力於安慶又前

因小池口防守空虛分兵扼守曾國藩近於湖  
口要地添派知府屈蟠一千人而南岸東流縣  
城爲水師餉道所必經復由鄂省酌調參將黃  
澤遠前往駐守此東路布置之情形也黃州六  
千餘人訓練已成因商固告警恐賊從六安霍  
山繞出漢陽德安黃州之閒又因湖南永州八  
屬徧地皆賊恐侵及衡州寶慶之邊邑先後撥



去水師四營陸師四營馬隊二百名湖南撫臣  
駱秉章念鄂城之虛空復將漢軍文生李雲麟  
一營調回鄂城湘省賊勢方熾備多力分且虞  
滋蔓設衡寶兵力不敷則岳鄂同時震動將有  
防不勝防之患現於麻城黃州抽撥二千人回  
防武昌並於下游潯皖江面再調水師二營回  
防岳州此又南路布置之情形也勝保前奏自

未悉湖南近日情形不知鄂省南路空虛長江  
天險勢若建瓴使賊於湖南逞志則由南路拊  
鄂之背由西路窺蜀之藩後患方大兵事轉恐  
棘手征皖之師孤軍未可深入應俟湖南軍務  
稍定方可併力皖省

官文胡林翼又奏言臣胡林翼墨經從軍志在  
討賊其必不能入皖之故則以楚境鄰氛四逼

前此尙祇策應皖江南北岸近日情形湖南震驚更須兼慮南路自應仍紮黃州以爲各路根本將軍都興阿及多隆阿鮑超李續宜唐訓方共事最久誠信相孚必可得其心力設異日出省遠勦驟歸他人節制恐性情未必相投不若各勦各路以專責成庶兩軍不起猜嫌而大局仍不分畛域應請嗣後楚軍無論入皖界入江

南界其糧餉軍火及調度機宜均歸臣官文臣  
胡林翼一手經理較歸各省大臣節制呼應自  
靈也至逆首久踞金陵原宜併力東征成四面  
合圍之勢惟皖中全境糜爛實難躡等而趨去  
歲三河之挫欲速反遲可爲炯戒查安慶爲長  
江上下關鍵舒桐宿太爲江楚通衢東流蕪湖  
東西梁山太平采石透迤大江南岸在在皆有

賊雖使未能節節埽除卽令迅克金陵亦慮蔓  
延江浙後患尙不可知竊計規復金陵必須先  
清皖省欲清皖省必須先清沿江上下若能以  
馬步輔翼水師由宿太舒桐攻克安慶步步爲  
營次第下擊力扼大江則金陵之接濟可斷勢  
將不攻自克廬州離江旣遠又不與楚境毗連  
若由六安進攻陸路運餉綦難又係孤軍深入

現派參將余際昌等紮營於英霍之間爲六安  
後路聲援勝保一軍尙不爲單現在應援浦口  
一路如能得手自當以全力圖復廬州廓清北  
境進規懷鳳遠固淮徐然後專注東南楚軍亦  
沿大江而進曾國藩既定豫章卽由皖南而進  
水陸並下三路分馳必可埽穴擒渠以安全局  
現楚軍已進太湖英山俟湖南分援馬步水師

聞

撤回便擬力圖進取奏人均報

二十六日

寅丙僧格林沁奏言欽奉

諭旨傳振邦奏北路軍情緊要請於天津防堵官兵內  
添撥得力馬隊一千名前往助剿著僧格林沁酌量  
辦理如此項官兵不能抽撥卽於備調之綏遠歸化  
二城官兵內調撥五百名飭令馳赴安徽蒙城一帶

交傳振邦調遣等因臣詳細籌畫逆匪紛竄蔣壩必  
須添助兵力以免北突之虞歸化綏遠二城官  
兵恐不能得力若抽撥吉林黑龍江官兵五百  
名亦覺單少查吉林續到官兵一千名將次到  
齊應卽先行撥往臣當飛咨直隸督臣轉飭前  
項官兵速赴傳振邦軍營以資助勦至續調黑  
龍江官兵一千名不日到津若一併撥往該提



督統帶馬隊卽有四千餘名似足以當一面

同日勝保翁同書奏言自天長復陷臣勝保移

守盱眙前路復分布各軍趕赴舊鋪泥沛灣馬

家壩一帶扼紮堵禦一面調集官兵由汭澗鎮

會同總兵張得勝等相機進剿該逆恃衆攻我

汭澗營盤經守營兵勇連環槍礮轟擊斃賊五

六百名賊猶捨命撲至濠牆又經各兵勇刀砍

矛刺並用火彈焚燒復斃賊千餘名該逆始撤退二三里紮營二十餘座層層圍裹致米糧火藥不能運送入營頗形危急臣令穆騰阿馬隊官兵向前衝擊踏毀賊壘二座斃賊一二百名張得勝整齊隊伍出營夾擊踏毀賊營四座且戰且退立即突出重圍該逆見我兵全師而去遂用大股抄裹而來經我馬隊官兵登時擊退

卽於舊鋪一帶連營扼紮以資協力其成興黃  
誠忠等川兵川勇二營因相距稍遠尙未能立  
時撤出殊深焦灼查首逆四眼狗陳玉城死黨  
六七萬麇集皖境計自六合以達天長橫軼蔓  
延頗難收拾一經竄突路路可通但使有得心  
應手之兵自足收扼吭拊背之勢無如隨臣進  
剿者步卒不滿五千騎兵不過八百東逐西馳

疲於奔命以之當方張之寇扼四達之衝實覺  
應接不遑况盱眙向無城池蔣壩尤爲切近現  
咨催和春張國樑等迅由江南北調派援軍尅  
日越境會勦直抵天長東南旣以力顧儀揚卽  
可牽制賊勢庶臣得以相度情形由西北面統  
軍會合前進臣聞天津防務業經親王大臣僧  
格林沁妥爲辦理總兵樂善本爲臣營得力之

人目下北路捻勢已衰況有傅振邦關保等馬  
步節節堵剿可資遏截較之皖北粵燄大張情  
形輕重不啻倍蓰仰懇

皇上天恩飭下樂善統領馬隊一千名星夜取道清江

來盱歸臣調遣實於緊要軍情裨益匪淺再臣

駐扼盱眙力保清淮恐逆衆不得北犯折而西  
趨則滁來定遠皆當其衝現已由臣翁同書就

近設法調撥堵剿設有警急再當酌量抽撥馬  
步兵勇馳往應援以固根本均奏入

上命軍機大臣傳諭僧格林沁曰傳振邦所需馬隊該  
大臣已飭吉林續到兵一千名前往現在皖北逆燄  
臨張情形尤爲緊急必須馬隊赴援方資得力著僧  
格林沁酌度情形卽撥馬隊千名或數百名取道清  
江前赴勝保軍營助剿至樂善不能前往可另派妥

員管帶

上又命軍機大臣傳諭勝保翁同書曰逆匪攻陷天長  
勝保移師扼守盱眙前路並親至舊鋪調度詎逆勢  
衆多將汧澗營盤層層圍裹張得勝一營雖已撤出  
其成興黃誠忠等所帶川兵川勇尙未突出重圍著  
該大臣激勵將士內外夾攻務將全軍撤出爲要現  
在賊勢旣趨重盱眙一路已諭令和春等迅派援師

不分畛域赴天長一帶越境會剿勝保卽可會同剿辦仍嚴防盱眙前路毋令竄越警及清淮樂善現在天津防海恐未能前往安徽所請調撥馬隊之處已諭知僧格林沁酌量辦理矣

上又命軍機大臣傳諭和春張國樑許乃釗曰逆匪悉集皖境自六合以達天長橫軼四出盱眙爲北路扼要之地設有疏虞剿辦愈形棘手和春等前派熊天



喜帶兵四千渡江援勦復添派兵勇一千交張玉良  
調遣此時儀揚一帶布置諒已周妥勝保一軍兵單  
賊衆情形甚屬危急著和春與張國樑會商迅速調  
派援軍前往與勝保會同勦辦毋令北竄清淮是爲  
至要

同日勞崇光奏言江西南安逆匪竄擾湖南郴  
桂一帶蔓延至永州府屬零陵東安道州江華

永明等處與粵西邊境處處毗連該匪人數衆多勢甚猖獗粵西全州爲北路門戶防堵尤關緊要查有委署潯州府知府蘇鳳文久任全州情形熟悉臣已委令馳往督同現署全州凌昆添募勇丁扼要防堵並委候選教諭李若霞由省管帶勁勇五百名馳往相機策應其餘界連楚省之灌陽恭城富川等縣均責成各地方官

募勇齊團一體嚴防一有警報再行添派壯勇  
前往協同堵剿奏入

上命軍機大臣傳諭駱秉章曰逆擾湖南郴桂一帶蔓  
延永州等屬恐竄入粵西邊界駱秉章素顧大局前  
次調撥各軍諒亦陸續到湘著卽督飭在事文武速  
籌勦辦其竄近粵境匪徒仍著駱秉章撥兵援應毋  
令回竄粵西致滋蔓延湖南近日勦匪情形並著駱

秉章隨時奏聞以慰廑念

二十九日己鄭魁士奏言總兵米興朝派隊進

攻南陵逆匪分路抵禦我軍槍礮連環橫衝直  
擊立斃黃衣騎馬賊二名逆勢不支各軍勇氣  
百倍爭先追殺逆衆奔竄立將章村湖海家山  
工山坊等處賊壘一律蕩平潰匪由何灣分竄  
三里店嶺防等處參將石玉龍攻其前米興朝

截其後該逆一見我軍旋即遠遁四月初十日  
匪犯管林守備陶兆煊等合力迎勦該逆愈聚  
愈衆山徑伏賊齊出守備葉廷彪把總吳金龍  
手刃數賊血戰陣亡石玉龍帶勇趕到併力斃  
勦連開排槍繼以噴筒火箭王得勝等從旁夾  
擊該逆首尾不能兼顧分路潰逃復有援賊來  
撲石玉龍乘勝揮軍一擁而上斃賊多名譚廣

勝等後隊槍礮連環該逆紛紛敗竄惟查九龍  
廟踞逆負嵎如故南陵軍力未便久分前調浙  
省各軍前隊已抵廣建飭赴涇縣協守並令蔣  
錫光一軍趕赴各嶺與石玉龍等相機會剿又  
探聞池繁股逆續至數千於石碗一帶添築賊  
卡圖窺潯汴當蕪股逆又來數千盤踞青山亭  
頭一帶偏近黃池該處爲甯郡門戶臣卽於十

三日進紮灣沚督率各路將士嚴加防範一俟  
浙軍後隊到齊卽行分兵添紮此次南陵三里  
店嶺防疊日接仗統計斃賊五百餘名生擒十  
五名割獲首級三十六顆搜獲米糧甚多所有  
守備葉廷彪把總吳金龍力戰捐軀實堪憫惻  
仰懇

天恩均照陣亡例議卹以慰忠魂奏入

上諭內閣曰南陵官軍疊獲勝仗埽平賊壘著鄭魁士  
督飭在防將士將石碯亭頭等處踞匪趕緊撲滅淨  
盡以期肅清甯郡毋稍延緩守備葉廷彪把總吳金  
龍力戰捐軀殊堪憫惻均著交部照陣亡例議卹